

Lëtzebuerg, den 6. August 2021

Här Fernand ETGEN
Chamberspräsident
LËTZEBUERG



DEMOKRATESCH
PARTEI

Chambre des Députés
Groupe Parlementaire

Här President,

Esou ewéi den Artikel 80 vum Chambersreglement et virgesäit, bieten ech Iech, dës parlamentaresch Fro un d'Madamm Ministesch fir Ëmwelt, Klima an nohalteg Entwécklung, un den Här Minister fir Mobilitéit an ëffentlech Aarbechten an un den Här Wirtschaftsminister weiderzeleeden:

„Viru kuerzem huet den Ëmweltministère e Moratoire op nei Weeër duerch de Bësch fir zwee Joer decidéiert. Gläichzäiteg ass den Ausbau vum Vëlospistèreseau zu Lëtzebuerg eng zentral Prioritéit, net nëmme vun der Regierung, mee och op lokalem Plang, woubäi allerdéngs eng ganz Partie Vëlosweeër och duerch de Bësch ginn respektiv solle goen.

Donieft soll och d'Quantitéit un Holz dat dierf gehae ginn, vun 120.000 m³ op 30.000 m³ reduzéiert ginn.

An deem Kader wollt ech der Madamm Ministesch fir Ëmwelt, Klima an nohalteg Entwécklung, dem Här Minister fir Mobilitéit an ëffentlech Aarbechten an dem Här Wirtschaftsminister folgend Froe stellen:


- *Si vun dësem Moratoire och nei national a kommunal Vëlosweeër, déi duerch e Bësch ginn, betraff?*
- *Wa jo, wéi eng Vëlosweeër wiere genee betraff?*
- *Wat sinn d'Konsequenzen vun der Reduktioun vun Holz, dat dierf gehae ginn, op d'Entwécklung vun enger lokaler Wäertschöpfungsketten am Beräich vum Holz (Wood Cluster)?“*

9, rue du St. Esprit
B.P. 510
L-2015 Luxembourg

Tel. : 22 41 84 1
Fax : 47 10 07

dp@dp.lu
www.dp.lu

Mat déiwem Respekt,



Max HAHN
Deputéierten



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

Luxembourg, le 12 octobre 2021

Service central de législation

Monsieur Marc Hansen

Ministre aux Relations avec le Parlement

Objet : Question parlementaire n°4811 – Réponse

Monsieur le Ministre,

J'ai l'honneur de vous communiquer en annexe la réponse à la question parlementaire n°4811 tout en vous priant de bien vouloir en assurer la transmission à Monsieur le Président de la Chambre des Députés.

Recevez, Monsieur le Ministre, l'expression de mes sentiments distingués.

La Ministre de l'Environnement, du Climat
et du Développement durable



Carole Dieschbourg

Gemeinsam Äntwert vun der Ministesch fir Ëmwelt, Klima an nohalteg Entwécklung, dem Minister fir Mobilitéit an ëffentlech Aarbechten an dem Wirtschaftsminister op d'parlamentaresch Fro n°4811 vum 6. August 2021 vun dem éirewäerten Députéierten Här Max Hahn iwwert ee Moratoire fir Bëschweeër

Si vun dësem Moratoire och nei national a kommunal Vëlosweeër, déi duerch e Bësch ginn, betraff? Wa jo, wéi eng Vëlosweeër wiere genee betraff?

Fir d'éischt ass ze bemierken datt ee Vëloswee am Bësch kee normale Bëschwee ass, an also nët de facto ënnert de Moratoire fält. De Moratoire fir Bëschweeër bezitt sech och just op déi ëffentlech Lafholz Bëscher.

D'Stroossebauverwaltung lancéiert entspreichend Ëmweltetuden esoubal ee geplangten nationale Vëloswee:

- eng Schutzzone duerchfiert oder un eng ugrenzt (Gebietsschutz). Nom nationale Naturschutzgesetz gëtt den Impakt vun esou Projeten op déi europäesch geschützten Zonen (Natura 2000) an déi virkommend Aarten no enger festgeluechter Prozedur evaluéiert. Dës Prozedur besteet aus verschidde Phasen, déi ënnert dem Artikel 32 vum Naturschutzgesetz (loi modifiée du 18 juillet 2018 concernant la protection de la nature et des ressources naturelles) beschriwwen sinn;
- geschützten Aarte beanträchtegt (Artenschutz). Och hei gëtt et eng Virgoensweis fir déi europarechtlech streng geschützten Aarten ze analyséieren an esou den Impakt ze bewäerten. Hei sinn d'Artikelen 18 bis 28 vum Naturschutzgesetz maassgeblech;
- ee Biotop zerstéiert (Habitat- und Biotopschutz). No den Artikelen 14, 17 a 21 vum Naturschutzgesetz a weidere Reglementer sinn déi Strukturen ze erfaassen an ze bewäerten. Et ginn op där Basis Kompensatiounen duerchgefouert an/oder eng « Taxe de Remboursement » (Ökopunkten) bezuelt fir Kompensatiounen-Moosnamen ze finanzéieren.

Op Basis vun dësen Etudë gëtt ee Projet ausgeschafft, an uschléissend gëtt eng Ufro fir eng Autorisatioun, konform zum Naturschutzgesetz, beim Ministère fir Ëmwelt, Klima an nohalteg Entwécklung (MECDD) fir de Bau gestallt.

Wat sinn d'Konsequenzen vun der Reduktioun vun Holz, dat dierf gehae ginn, op d'Entwécklung vun enger lokaler Wäertschöpfungsketten am Beräich vum Holz (Wood Cluster)?

Et ass zu kengem Moment vum MECDD matgedeelt ginn, dass den Holzschlag op 30.000 m³ soll reduzéiert ginn. Dat ass eng falsch Interpretatioun vum Mouvement écologique an senger Kommunikatioun vum 12. Juli 2021.

Am Kader vum Workshop "Résilience forêt", den de 15. Juni stattfonnt huet, huet de MECDD matgedeelt, dass an den ëffentleche Lafholzbëscher an Zukunft net méi wéi 60 % vum järelechen Holzzouwuess vun 200.000 m³ solle genotzt ginn. Dat sinn ca. 120.000 m³. Dës Decisioun ass aus Virsiichtsgrënn geholl ginn a berout op Berechnungen aus der "Étude du potentiel de la biomasse forestière récoltable au Luxembourg" aus dem Joer 2020. Domat soll d'Resilienz vun de Lafholzbëscher verbessert ginn an och den Holzvolumen am Bësch gesteigert ginn fir méi Kuelestoff ze späicheren als Beitrag zum Klimaschutz.

Als Konsequenz vun den dräi aussergewöhnlechen dréchenen a waarme Summeren 2018-2020 ass den Holzschlag an den ëffentleche Lafbëscher am Joer 2020 souguer op 80.000 m³ gedrosselt ginn, an dëse Volume soll och am Joer 2021 net iwwerschritt ginn. Dës zousätzlech Reduzéierung vum Holzschlag kann doduerch erkläert ginn, dass vill Beem, déi an de leschte Joren ofgestuerwe sinn, musse gefällt ginn, an dass den Ekosystem Bësch net nach zousätzlech strapazéiert soll ginn.

Wat d'Konsequenze vun dëser Reduktioun vum Holzschlag op déi lokal Wäertschöpfungsketten am Beräich Holz betrëfft, gëllt et ze bedenken, dass nëmmen ee klengen Deel vun dem recoltéierten Holz fir méi héichwäerteg Zwecker genotzt gëtt. Lokal méi héichwäerteg Produkter aus Holz wäerten deemno och an Zukunft mat enger Reduktioun vum Holzschlag nach kënnen hiergestallt ginn.